

ALAHADY FAHA 17 MANDAVANTAONA - A



I JESOA ILAY VATOSOA SAROBIDY

Ry Kristianina havana, ny fivelomantsika ny maha vavolombelona antsika eo anivon'ny fiaraha monina ka mahatonga antsika ho Kristy mpiara-belona amin'ireo manodidina antsika dia mitaky safidy matotra ary mitaky fahendrena izay tsy arak'izao tontolo izao fa ilay fahendrena omen'Andriamanitra tsilovin'ny Fanahy masina antsika. Izany ny foton-pampianarana amin'izao

Alahady faha-17 mandavantaona handalinantsika ny finoantsika izao. Nahatsapa an'izany ny mpanjaka henontsika tamin'ny vakiteny voalohany androany fa ny faharitan-tsaina sy fahendrena tena izy dia tovozina ao amin'Andriamanitra fa tsy eo anivon'ny herin-tsaina na vokatry ny harena fotsiny. Ny tena harena marina dia ny

Vakiteny I : Mpanjaka 3,5.7-12.

Tononkira : Salamo 119

Vakiteny II : Rôm. 8,28-30.

Evanjely : Matio 13,44-52.

fahendrena izay manampy ny olona hana ny fivelarana ny maha-olona manontolo sy ny olondrehetra. Izany indrindra no tantaran'i Salomona zanak'i Davida mpanjaka **rentsika tamin'ny vakiteny voalahany**.

Araky ny fifidianana sy ny fiantson'Andriamanitra dia izy no fantantsika fa nitondra ny vahoaka, tsapan'i Salomona fa tsy mandeha ho azy izay fa mila ny fahendren'Andriamanitra ka hoy izy " Ary ankehitriny, laveh Andriamanitra ô, efa nampanjaka ny mpanomponao handimby an'i Davida raiko hianao; izaho anefa dia mbola tovolahy tanora kely tsy mahay mitondra tena.

Ary ny mpanomponao dia eo afovoan'ny vahoakanao, izay nofidinao, vahoaka be dia be, tsy azo vinavinaina ny habetsahany, tsy tambo isaina, fa maro be loatra.

Koa saina mahiratra no omeo ny mpanomponao, hitsarako ny vahoakanao, hanavahako ny soa sy ny ratsy. Fa iza moa no hahay mitsara izao vahoakanao maro be izao!"

Ry Kristianina havana amin'izao andro iainanntsika sy ny **zava-misy** hetrehin'ny firenentsika izao dia aoka isika hivavaka ho an'ireo mpitondra antsika. Enga anie ny mpitondra antsika hahatsapa tahaka an'i Salomona fa mila fiovam-penitra mahery vaika izao andro iainantsika izao ka hangataka amin'Andriamanitra ny fahendrena sy faharitan-tsaina. Mivavahà isika mba hanana an'izany toetra izany ireo mpitondra antsika ary isika tsirairay avy hanana ny faharitan-tsaina sy fahendrena. Mitaky safidy izany rehetra izany satria maro ny fakam-panahy mety hisintona antsika eo amin'ny fiainantsika andavanandro. Aoka ary araky ny Evanjely izay norenesintsika teo, raha te-hahazo ny sarobidy isika, raha te-hahazo ny soa **na** dia **izay heverintsika** tsara aza **dia** tsy maintsy avelantsika sy afointsika.

Ny fanjakan'ny lanitra dia tahaka ny rakitra nafenina teny an-tsaha tsy hitan'ny olona, ka lasa tamin'ny haravoana izy nivarotra an'izay mety ananany mba ho afaka hividy an'io saha io. Namidiny ny fananany, izany hoe tsy maintsy mahafoy isika na dia ny tsara aza mba hazahoana an'izay voahangy tsara izay. Izany ary no ampianarin'ny Eglizy amintsika amin'ny fiekem-pinoana ataontsika mba tsy ho tratin'ny fakam-panahy sy hahafahantsika mandray ny tena tsara.

Ry Kristianina havana, ry tanora zandry malala, tena ankatoky ny fankalazana ny JMJ isika koa mahaiza ary ny mifidy ny rakitra tsara, aza misalasala ny mamarotra an'izay sarobidy indrindra amintsika izay midika fahafoizana ho an'Andriamanitra mba hazahoantsika ilay fahasoavana avy amin'Andriamanitra dia ilay rakitra sarobidy dia ilay hasambarana : 'Sambatra ny malemy fanahy fa izy no handova ny lanitra" izany hoe manaiky ho resy, manaiky hilaozana, manaiky an'izay mety tsy mifanaraka amin'ny sitrak'Andriamanitra, avelao sy ario ireny ho lavitra anao mba hahazoanao handova ny tany.

Maro ny fanoharana mikasika ny fanjakan'ny lanitra : " Ny fanjakan'ny lanitra dia tahaka ny harato nalatsaka tany anaty ranomasina, ka nanangona izao karazan-kazandrano rehetra izao; rahefa feno izy dia nosarihana ho eny amoron-drano, ka nipetraka ny olona nifantina ny tsara hataony an-karona, fa ny ratsy kosa nariany.

Ny fanjakan'ny lanitra dia tahaka ny mpandranto mitady voahangy tsara. Ary nony nahita anankiray be vidy izy, dia lasa nivarotra ny fananany rehetra ka nividy azy"

Izany rehetra izany raha fintinina dia fanoharana ataon'i Jesoa mampianatra antsika ny hazahoantsika fahasoavana ka tsy maintsy misy safidy matotra atao amin'ny fiainantsika. Niany ny hoavy fa tsy rahampitso ka arakaraky ny andrafentantsika ny fianantsika androany ny sotoantsika ny soa rehetra amin'ny hoavy. Raha mamboly hazo androany isika dia afaka mialokaloka aminy any aoriana fa raha manapotika kosa isika dia fantaro fa potika ny hoavintsika. Aoka ho "génération" mpanorina sy mpanavao isika tanora fa sanatria tsy ho mpandrava. Afaka hanatanteraka an'izany isika raha manaraka ny fampianarana ataon'i Md Paoly ao amin'ny vakiteny faharoa : "*Fantatsika koa fa ny zavatra rehetra dia entin'Andriamanitra hahasoa izay tia azy, dia ireo efa voantso araka ny fandaharany.*

Satria izay fantany rahateo no notendreny hitovy endrika amin'ny Zanany koa, mba ho Lahimatoa amin'ny rahalahy maro izy. Ary izay notendreny no nantsoiny koa; izay nantsoiny no nohamarininy koa; izay nohamarininy no nomeny voninahitra koa"

Raha isika mikolokolo an'ireny talenta omen'Andriamanitra antsika ireny, tsy entintsika hanilikiliana ny hafa fa entina hampivondrona (constructeur, batisseur), hanao tetezana isika hoy ny Papa, dia entin'Andriamanitra hanasoa antsika izany. Enga anie isika tanora jiaby, isika olo araiky jiaby hitovy endrika amin'i Jesoa, amin'izay isika no Kristy mpiara-belona eo anivon'ny manodidina antsika ka hitondra ilay harena voahangy tsara tahaka ny amin'ny fanoharana enontsika tamin'ny Evanjely dia tsy iza fa i Kristy. Enga anie hazava saina isika, hazava saina ny mpitondra antsika, hitondra an'i Kristy ilay harena ka handroso ao anatin'ny fiadanana isika mianakavy.

Ry Jesoa zokinay ô, enga anie izahay ho vonona hahafoy ny zavatra izay tsy mifanaraka amin'ny sitrakao kanefa mahasarika anay, aoka izahay ho tahaka an'ilay ao amin'ny evanjely, vonona hahafoy eo am-pitadiavana ny tena vatosoa sarobidy ary tsy iza izany fa ianao Jesoa Kristy ilay hasambarana. Raha manana anao izahay dia halemy fanahy ka handova ny tany ary indrindra hahay hanasoa ny hafa eo amin'ny mpiara-belona aminay ka izahay tokoa no Kristy mpiara-belona amin'ireo manodidina anay mba hahafantarany fa ianao tokoa no vatosoa sarobidy, ianao no harena sarobidy ka hifidy anao koa izy ireo. Tsy izahay no nifidy anao fa ianao no nifidy anay ka ombaon'ny fahasoavanao mandrakariva anie izahay mba ho mendrika anao amin'ny fiainanay andavanandro. Amen

Mompera Arseveka Mgr Benjamin Ramaroson